


La'o Hamutuk

Institutu Timor-Leste ba Monitor no Analiza Dezenvolvimentu

Rua Dom Alberto Ricardo, Bebora, Dili, Timor-Leste

Tel: +670-3321040 ka +670-77234330 (mobile) email: laohamutuk@gmail.com

Website: www.laohamutuk.org



Submisaun ba Komisaun C no Deputadu/a hotu iha

Parlamentu Nasionál

Husi

La'o Hamutuk

Kona-ba

Proposta Orsamentu Estadu 2024

6 Dezembru 2023

Konteúdu

Introdusaun	2
Rai Naruk Fiskál Alarme ba Mudansa iha Narrativu Dezenvolvimentu.....	2
Timor-Leste karik la iha tan Mina no Gàs barak atu Kontinua Justifika Despeza boot.....	4
Promove Rekursu Umanu ho Maneira Ekitável no Justu	5
Timor-Leste Presiza Realistíku iha Investimentu iha Setór Produtivu	7
ASEAN La'ós Urjente, Soberania Ai-han mak Importante	8
OJE la Fó Prioridade ba Mudansa Klimátika no Ambiente	9
Konkluzau no Rekomendasaun.....	10

Introdusaun

La'õ Hamutuk apresia tebes ho Parlamentu Nasionál ne'ebé nafatin fó biban mai ami atu hato'õ perspetiva no analiza sira liu husi Submisaun ida ne'e, maske ami hanoin katak soru-mutu hasoru malu mak dalan di'ak liu atu hato'õ ho kle'an no analiza krítiku ba proposta Orsamentu Jerál Estadu 2024, ne'ebé bele tulun mós distintu/a deputadu/a sira hotu iha uma fukun Parlamentu Nasionál atu reforsa iha prosesu diskusaun no aprovasaun orsamentu ho Governu.

Ami apresia tebes ba Governu da-IX ne'ebé konsege submete ona proposta ida ne'e, maske ami hanoin katak pedidu atu diskute ho urjénsia la realistiku atu fó tempu nato'on ba Deputadu/a sira hodi diskute no analiza ho kuidadu nune'e bele finaliza ho desizaun ne'ebé mak prudente liu.


Haree ba tema jerál husi proposta OJE 2024 nian deskreve ho di'ak tebes kona ba Governu nia prioridade atu hakbiit futuru nasaun nian liu husi investe iha setór ne'ebé produtivu liu, maibé hirak ne'e hotu la hatudu iha apropriasaun proposta OJE, oinsá Governu bele duni investe sériu iha setór sustentável sira. Governu propoin tetu fiskál ida aas tebes liu senáriu dahaat iha apresentasaun jornada orsamentál, maioria nafatin ba projetu Tasi Mane no Greater Sunrise ne'ebé realidade seidak iha serteza no nafatin alokasaun sira sirkula iha gastu rekorente.

Iha submisaun ne'e, La'õ Hamutuk fornese informasaun no rekomendasaun balu ne'ebé bele ajuda Parlamentu Nasionál atu konfirma no deside ho di'ak ba intensaun sira ne'ebé Governu propoin ba OJE tinan 2024 iha debate plenária.

Rai Naruk Fiskál Alarme ba Mudansa iha Narrativu Dezenvolvimentu

Haree ba levantamento husi Fundu Petrolíferu (FP) nafatin hatudu katak ita nia dependénsia kontinua aas no kuaze ita seidak bele kobre défise husi reseita finansiál ida ne'e. Bazeia ba tabela iha proposta lei OJE 2024 hatudu katak reseita konsolidadu mak biliaun \$1,96 ne'ebé biliaun \$1,38 (71%) transfere direta husi FP iha tinan fiskál 2024. Reseita seluk mak tokon \$280 mai husi carryover (inklui RAEOA) ne'ebé maioria mai husi FP iha pasadu. Tokon \$25 husi empréstimu, no ita tenke selu fali tusan (maioria husi FP) iha futuru. Seluk inklui tokon \$195 husi reseita doméstika, tokon \$15 husi doador sira no pagamentu ba Seguransa Sosiál tokon \$56.

Reseita iha proposta OJE ba tinan 2024
biliaun \$1.96 total (esklui transferensia internal Seg. Sos.)
84% mai husi Fundu Petrolifeiru iha pasadu, agora, ka iha futuru.




Grafika husi La'õ Hamutuk bazeia proposta Orsamentu Estadu ba 2024. Dezembru 2023.

Apropriaun iha leten hatudu kondisaun dependénsia ida ne'e sai kestaun ne'ebé Governu tenki hanoin katak presiza alternativu sustentável liu no urjente duni atu aseguira katak jersaun tuir mai sei la sofre fali ba desizaun agora. Kampu Greater Sunrise karik sei fó osan balun ba Estadu Timor-Leste maibé ida ne'e sei inserteza hela, no tenke hein tinan lima to'o sanulu atu hetan reseita husi kampu ida ne'e. Atu di'ak liu ita labele nega oportunidade finansiál no polítika atu investe ba rekursu umanu no diversifika ekonomia antes monu ba rai naruk fiskál.

Realidade durante ne'e dependénsia ekonomia ba despeza estadu nian maioria husi FP, no sei susar liu bainhira Timor-Leste laiha ona Fundu Petrolíferu, sei fó impaktu maka'as ba ekonomia tomak inklui pagamentu ba empregu públiku sira, iha setór privadu no mós PIB hatudu ba ita oinsá preokupasaun ne'ebé kuaze daudaun ne'e ita hasoru.

Deskrisaun sira di'ak tebes iha livru proposta OJE 2024 kona ba programa no analiza previzaun makro-ekonómiku sira, maibé ami dúvida ba planu transferénsia husi FP kada tinan, hahú husi 2024-2028 ne'ebé sei kontinua aumenta maske Governu konsiente katak RSE sei tun kada tinan hanesan hatudu iha gráfiku tuir mai ne'ebé halibur husi projesaun Governu nian:



Levantamentu liu RSE iha 2028 biliana \$1,57, liu dala rua ho levantamentu liu RSE iha tinan 2023. Ho levantamentu hanesan ne'e, FP sei remata iha tempu besik. Ami sujere atu Parlamentu Nasionál uza ita boot sira nia kompeténsia tomak atu ezije Governu hato'o esplikasaun klaru no kompletu kona ba informasaun hirak ne'e.

Timor-Leste karik la iha tan Mina no Gàs barak atu Kontinua Justifika Despeza boot

Prosesu atu buka mina no gas iha tasi laran no rai maran iha territóriu Timor-Leste hahú iha tinan barak liu ba no realidade katak iha tinan 1995 deskobre kampu boot Bayu-Undan, ne'ebé prodús iha 2004 no fó ona reseita biliaun \$23,9 ba Timor-Leste, liu husi Fundu Petrolíferu. Kampu rua seluk, Kitan no Elang-Kakatua ne'ebé para ona sira nia produsaun, fornese biliaun \$1,7. Hanesan mós ho vida Bayu-Undan nian sei remata nia produsaun iha tinan 2023 nia rohan tanba rezerva hotu ona.

Timor-Leste foti ona osan tokon \$650 (no mós tokon \$130 iha funan até agora) husi FP hodi sosa partisipasaun iha konsorsiu Greater Sunrise, no gasta tiha ona biliaun \$1,3 resin tan ba komponente balun iha Projetu Tasi Mane, ne'ebé Governu define nudár kondisaun ba dezvoltimentu kampu Greater Sunrise. Ami triste atu haree katak mehi kona-ba setór petrolíferu nafatin hetan esperansa primeiru iha Planu Anuál Investimentu Estratéjiku (Livru OJE 4.4, pajina 3), maske Governu seidak fó prioridade ba diversifikasaun ekonomia.

Iha PPL OJE 2024, Governu propoin atu gasta tokon \$13 ba *“Programa A18: Implementação do Projeto Tasi Mane na Costa Sul do País”* no tokon \$13 tan ba *“Programa A13: Desenvolvimento do Campo de Gás do Greater Sunrise e Assegurar que o Gasoduto vem para-Timor-Leste”*. Haree ba montante boot rua ne'e, Parlamentu Nasionál presiza hatene kustu total hira ba Projetu Tasi Mane, no hira mak ba Greater Sunrise tomak, agora no iha futuro? Aleinde ne'e, presiza atu hatene ho kle'an previzaun orsamentál sei mai husi ne'ebé, sei fó benefísiu saida ba povu no nasaun no presiza konsidera risku ambientál, rai produtivu sira sei lakon nia funsaun no sei lakon oportunidade finansiál ba setór importante sira seluk, antes foti desizaun hodi gasta osan hirak ne'e tomak husi ita nia rekursu limitadu Fundu Petrolíferu.

Governu ida ne'e fó esperansa katak Timor-Leste kontinua iha rezerva mina no gas barak atu justifika gastu barak liu tan ba Projetu Tasi Mane. Infelizmente, estudu sira dezde tinan atus liu ba la hatudu katak ita iha rezerva barak. Hanesan realidade ne'ebé mak ita hotu konsiente katak mina no gas nudár enerjia ne'ebé la renovavel no la sustentável, kuandu hahú ona prodús ninia finalidade mós hahú konta ona to'o periodu remata.

Kampu balun maske iha faze perfurasaun mós bele la hetan rezerva komersiál – Buffalo nudár ezemplu iha peskiza, kampu ne'e konfirmadu katak rezerva la komersiál. Maske antes ne'e parte sira ne'ebé involve iha konfiansa no esperansa atu prodús. Seluk hanesan Timor Resources ne'ebé halo perfurasaun iha posu balun iha Covalima, sira reklama iha deskobrimentu por tékniku maibé ida ne'e la signifika iha ona justifikaun komersiál atu dezvoltolve, presiza iha dadus no sertifikasaun husi instituisaun kredivel no investidór antes hahú preparasaun ba produsaun.

Nune'e, ami sujere ba Parlamentu Nasionál atu kuidadu no konsidera aspetu sira hotu antes decide no permite Governu gasta ita nia rekursu estratéjiku sira ba projetu ne'ebé finalmente la klaru ho nia retornu no presiza sukat risku ba ambiente, rai no direitus umanus. Ami sujere mós lista projetu petrolíferu pendente sira iha tabela tuir mai atu membru Parlamentu

Nasionál sira konfirma ho Governu kona-ba projetu sira ne'ebé kontinua promove maske seidak iha prova klaru kona ba kampu sira ne'e fó benefísiu saida, finansiamentu sei mai husi ne'ebé no sei fó benefísiu ekonómiku no finansiál hira ba Povu Timor-Leste?

Projetu sira pendente karik la ajuda barak.				
Projetu	Operadór (parseiru sira)	Rezerva mina no gas (mmBOE)	Reseita posivel iha futuru (tokon USD)	Situasaun atuál
Bayu-Undan	Santos 46% (SK E&S, Inpex, Eni, JERA/Tokyo Gas)	0	\$0	Prodús ona mmBOE 845 dezde tinan 2004, sei remata iha tinan 2023.
Greater Sunrise	Woodside 33% (TimorGAP 57%, Osaka Gas)	1,080	?	Deskobre ona iha 1974. Buka finansiamentu atu kontinua atu dezenvolve. Kustu kapitál boot tebes. TL sei hetan 70% husi reseita estadu nian. Iha 2020, Woodside no TimorGAP revaloriza ba zero.
Buffalo	Carnarvon 50% (Advance Energy)	0	\$0	Posu peskiza iha 2021-2022 la hatudu rezultadu komersiál. Projetu abandonadu.
Iha rai maran (Covalima & Manufahi)	Timor Resources 50% (TimorGAP)	40	\$600	Posu peskiza primeiru halo iha tinan 2021, analiza seidak hotu.
Chuditch	Baron Oil 75% (TimorGAP)	588 (?)	?	Shell fura ona posu peskiza iha 1998 maibé la kontinua. Baron Oil hakarak fura posu ida iha 2024, hafoin sira hetan finansiamentu.
Area kontratu haat tan	TimorGAP no Eni	?	Bele karik	Seidak iha informasaun to'o atu kalkula rezerva posível. Seidak iha planu atu fura posu tan.
Area lima husi konkursu foun	TimorGAP, ETO, HTS, Santos, Eni	?	?	Seidak halo peskiza.

Promove Rekursu Umanu ho Maneira Ekitável no Justu

Haree ba alokasaun sira iha proposta OJE 2024, Governu nafatin la fó prioridade másimu ba setór esensiál sira, no ami preokupa ho promessa Governu nian atu hadi'ak kondisaun moris povu nian ne'ebé nafatin sai preokupasaun boot.


Alokasaun ba setór esensiál sira hanesan saúde, edukasaun, bee moos no saneamentu kuaze 16% de'it husi total OJE 2024. Ami hanoin katak setór sosiál sira ne'e merese duni atu sai prioridade másimu ne'ebé Governu tenke tau matan, tanba evidénsia réal balu hatudu ona katak labarik sira ho idade tinan 5 mai kraik kontinua ho kondisaun ra'es-badak ho percentajen 47%, fasilidade apoiu saúde ne'ebé la adekua, moris kiak ne'ebé kontinua eziste ho percentajen boot.

Ami apresia ba iniciativa husi Governu nian hodi halo kriasaun *Unidade de Missão para o Combate ao Stunting* no prevee osan ho montante rihun \$300, maibé ami haree katak programa ne'e sei fó merenda ba inan isin rua no labarik idade menus tinan 12. Ami hanoin katak, maneira kombate nutrisaun prezisa reforsa liu tan liu husi programa ne'ebé estratéjika

no longu prazu liu atu promove elevasaun ai-han lokál hodi minimiza ba konsumu doméstika ne'ebé domina ho ai-han importadu.

Despeza ba kada setor iha OJE ba tinan 2024

OJE tomak = biliaun \$1.95



Gráfiku ne'e husi La'o Hamutuk bazeia ba proposta OJE 2024. 11 Dezembru 2023.

Nota ¹

Rekursu umanu nudár pilár importante ba dezvoltamentu nasaun nian, hodi garante sustentabilidade estadu no hasai povu husi kiak no mukit. Ita haree iha polítika Governu fó prioridade ba investimentu kapital umanu, maibé iha alokasaun setór importante hodi hadi'ak kualidade umanu nafatin la hetan atensaun sériu. Proposta OJE 2024 aloka tokon \$196 (9.6% husi total OJE) ba edukasaun, ne'ebé menus husi padraun internasionál (mínimu 15%). Governu no Parlamentu Nasionál tenke konsiente katak kualidade edukasaun ne'ebé menus tebes sei fó efeitu ba produtividade jersaun aban bainrua nian. Oinsá TL bele iha jersaun ne'ebé kualidade hodi kompete iha merkadu mundiál? Se to'ó ohin loron setór edukasaun kontinua la hetan atensaun husi estadu.

Ami hanoin Governu tenke fó prioridade ba eskola públiku sira iha territóriu tomak (pre-eskolár, ensinu báziku no sekundária), nune'e labarik hotu-hotu bele hetan benefísiu husi partisipasaun iha nivel edukasaun. Presiza hadi'ak infrastrutura báziku sira ne'ebé la

¹ La'o Hamutuk halo kalkulasaun despeza ba setór ne'ebé bazeia ba papél husi kada órgaun, la'ós husi programa ka 'funsaun'. Hanesan ezemplu, despeza iha Ministériu Saúde no HNGV hotu hola parte ba setór saúde, inklui despeza administrativa.

adekuaudu, inklui ekipamentu no kapasidade manorin na'in sira no facilidade apoiu ba aprendizajen nafatin la suficiente, falta formasaun no akompañamentu hodi aseguara implementasaun kurríkulu la'ó ho di'ak no loloos, inklui dadus husi *Education Management Information System* (EMIS) ne'ebé la atualiza dezde 2019. Problema hirak ne'e sai obstákulu ba Ministériu Edukasaun atu trasa sira nia planu bazeia ba dadus ne'ebé loos no válidu.

Tokon \$108 (5.3%) ba setór saúde ne'ebé importante tebes atu aseguara saúde pesoál hanesan rekursu umanu ba país ida ne'e, aumenta tan ho número malnutrisaun ne'ebé kontinua aas, moras hada'et oin-oin, mortalidade bebé no inan isin rua ne'ebé nafatin aas liu kompara ho nasaun sira seluk. Oinsá estadu bele responde situasaun ne'e bainhira estadu rasik la prioriza no valoriza nia povu?

Alokasaun ba be moos no saneamentu kontinua ki'ik tokon \$25 (1.2%), maske tuir Sensus 2022, uma kain menus 40% mak asesu ba torneira públiku, no uma kain ne'ebé torneira instala iha uma laran 10% de'it. Uma kain ne'ebé kontinua utiliza ou asesu ba mota, bee matan, lagoa, kolan no irrigasaun hodi utiliza ba nesesidade loron-loron nian hamutuk 9%.

Nune'e atu responde ba situasaun iha leten Governu presiza aumentu iha alokasaun balun ba atividade konservasaun rekursu bee (bee ulun), nune'e bele salva udan been infiltra ba rai laran hodi fornese bee ba bee-matan sira iha territóriu tomak. Aleinde, investe iha sistema no kanalizasaun, importante mós atu aseguara sustentabilidade rekursu bee.

Timor-Leste Presiza Realistíku iha Investimentu iha Setór Produtivu

Jerálmente, deskrisaun sira iha livru foun ida ne'e fó sai objetivu polítika ida di'ak tebes iha parte Planu Estratéjiku Investimentu Anuál, maibé ami lamenta ba lakon oportunidade hodi diskute kona ba *Lei Grande Opção do Plano* ne'ebé ami hanoin katak di'ak liu atu mantén hodi define kedas planu ba longu prazu no halo ajustamentu iha kada tinan.

Ami hanoin katak laiha valór atu kontinua repete ba asaun pasadu hodi krítika ba dezempeñu husi Governasaun antes, maske importante atu avalia no buka tuir prosesu sira ne'ebé la'ó la tuir regra aprovizionamentu maibé di'ak atu la gasta enerjia barak ba iha ne'ebá no di'ak liu atu tau konsentrasaun másimu hodi hadi'a futuru rai doben Timor-Leste no identifika prioridade no programa sira ne'ebé lori benefísiu réal liu ba povu agora no jersaun tuir mai. Nune'e ami enkoraja Parlamentu Nasionál atu partisipa ativamente ba prosesu tomak bainhira Governu iha intensaun atu halo avaliasaun no revizaun ba PEDN 2011-2030.

Kuaze dékada rua ona, Timor-Leste seidauk hatudu dezempeñu significativu ba investimentu réal iha setór produtivu atu bele sai baze ka rekursu ida hodi aseguara ekonomia Timor-Leste. Proposta Orsamentu Jerál Estadu 2024, liu husi investimentu boot iha setór ekonomia, maibé nafatin la hatudu investimentu adekuaudu iha setór produtivu ida ne'ebé konsidera importante. Proposta OJE tinan 2024 kontinua la hatudu polítika konkretu oinsá buka dalan alternativu hodi diversifika iha ekonomia ida ne'ebé resiliente no sustentável. Setór Agrikultura iha kada tinan kontinua laiha mudansa iha nia alokasaun ho de'it 2.1% husi total OJE 2024. Importante atu konsidera setór produtivu hanesan agrikultura no peska hodi fó

prioridade, tanba bazeia ba publikasaun husi *Integrated Food Security Phase Classification* 2023, Timor-Leste konsidera hanesan nasaun ida ne'ebé vulneravel no falta kapasidade bainhira hasoru La Niña, El Niño, no udan-anin tropikal.

Tuir sensus agríkola 2019, relata área kultivada ba ai-farina (7%), talas (2%), fehuk midar (3%), nuu (6%), hudi (5%), ha' as (4%), ai-dila (2%), kamii (2%), no bua (2%), maske iha poténsia no valor ekonomia, maibé seidak sai prioridade oinsá promove no dezenvolve dí'ak liu tan. Durante tinan rua-nulu resin ida, Governu investe barak ba produsaun hare no batar no tinan-tinan aloka orsamentu ba irrigasaun, sosa tratór, mekanizasaun, sosa fini nsst, maibé rezultadu produsaun seidak bele responde demanda doméstika, , inklui produktu poténsial sira seluk la dezenvolve.

ASEAN La'ós Urjente, Soberania Ai-han mak Importante

Governu no Parlamentu Nasionál hatene katak rai doben Timor-Leste kontinua hela ho situasaun frazil husi aspetu barak – ita nia povu nafatin vulneravel hasoru soke ka krize sira ne'ebé akontese husi rai li'ur no iha rai laran rasik. Ita iha problema estrutural oin-oin, ne'ebé barak mak ukun na'in sira temi beibeik durante diskursu públiku, hanesan pobreza multidimensional, dezempregu, malnutrisaun, dependénsia ba petróleu, rai naruk fiskál, dependénsia maka'as ba importasaun, qualidade servisu públiku fraku no seidak tuir padraun.

Politikamente, Governu iha interese boot hakarak adere ba ASEAN ho esperansa kona-ba benefísiu oi-oin husi ASEAN katak integrasaun ekonomia no komérsiu ba merkadu rejional no internasionál, fó oportunidade ba investimentu husi rai li'ur no sai poténsia foun ba hadi'ak ekonomia ba kria servisu (empregu). Iha tempu hanesan, laiha esplikasaun kle'an kona-ba saida mak dezvantajen ne'ebé Timor-Leste sei enfrenta bainhira integra ona ba ASEAN, hanesan tenke halo tuir akordu komérsiu livre ASEAN nian no tenke kumpre devér nudár membru.

Maske iha espektasaun oin-oin katak hola parte iha ASEAN sei lori benefísiu ba Timor-Leste, maibé bainhira ita seidak prepara ita nia ekonomia no setór importante sira hanesan agrikultura, ASEAN sei lori risku ba Timor-Leste, tanba nasaun seluk bele domina ita nia ekonomia no kontinua dependénsia ba produktu sira husi rai seluk no bele mós sai amesa ba ita nia soberania no iha tendénsia boot atu traballadór Timoroan lakon partisipasaun iha empregu ho traballadór sira husi membru ASEAN.

Bazeia ba analiza iha proposta orsamentu iha livru 3 kona ba Dezenvolvimentu Orsamentál, estrutura kada programa, iha parte *Dotação Geral do Estado* (pájina 61), kona ba alokasaun ba *Política externa de Timor-Leste*, aloka orsamentu tokon \$3,3 ho ninia atividade mak adezaun ba ASEAN. Orsamentu seluk mak aloka iha *Direção Geral para os assuntos da ASEAN* aloka rihun \$166 ho atividade *Implementa roteiro para adezaun ba ASEAN* inklui alokasaun ba Vise Ministra asuntu ASEAN osan hamutuk rihun \$240, inklui orsamentu ba embaixada sira ne'ebé la esensial hanesan iha Laos, Mianmar, Kamboja no Brunei hamutuk orsamentu rihun \$603.

Total orsamentu estadu 2024 atu adere ba ASEAN hamutuk tokon \$4,3. Maske Governu hanoin orsamentu ne'e ki'ik, maibe bainhira orsamentu ne'e ajuda ba toos na'in sira hadi'ak produsaun, haforsa indústría ki'ik prosesamentu, apoiu ba joven sira prodús no hakiak animál, ikan no atividade produtivu sira seluk sei iha valor boot liu kompara ho ASEAN ne'ebé mak inserteza.

Haree ba problema iha leten, di'ak liu Governu uza orsamentu ne'e investe ba setór importante sira ne'ebé bele ajuda povu hadi'ak sira nia moris no produsaun, duke gasta osan ba rezultadu ne'ebé mak la klaru no in-justisa. Setór agrikultura nudár ezemplu ne'ebé ita bele analiza, durante dékada rua ona seidauk hatudu progresu significativu iha produsaun ai-han, inklui produktu poténsia sira seluk. Produktu potenciál hirak ne'e, aléinde fó ai-han ba povu (seguransa ai-han) iha mós valor ekonomia.

OJE la Fó Prioridade ba Mudansa Klimátika no Ambiente

Haree ba esperiéncia tinan hirak liu ba no ohin loron, nasaun ki'ik ida ne'e frazil tebes ba kauza sira husi mudansa klimátika hanesan iha 2021 kona ba Siklone Seroja no rezulta udan boot no inundasaun hodi halo estragu barak iha infrastrutura sira hanesan estrada, ponte no torre eletrisidade até ema 44 mak lakon sira nia vida. Situasaun ambientál la'ós de'it ona sai preokupasaun nasaun ne'e nian de'it maibe krize global ne'ebé nasaun hotu preokupa, no maioria husi nasaun sira hahú ona konsidera situasaun ambientál iha sira nia prosesu dezvoltamentu.

Ho nune'e, haree ba nasaun Timor-Leste ne'ebé vulneravel tebes ba kauza sira iha mudansa klimátika, ami hanoin katak estadu tenke sériu mós atu konsidera asuntu klimátika hodi define fila fali ba funsaun importante husi instituisaun sira. Tanba realidade OJE la prioritiza protesau ambientál – ANLA nia meta atu fó lisensa de'it, no ANP nia alokasaun kona-ba lisençiamentu ambientál atu estabelese portal de'it.

Iha Orsamentu Retifikativu 2023, Sekretáriu Estadu Ambiente hetan tokon \$3,6, maibe agora la eziste. Iha proposta OJE 2024, Diresaun-Jeral ba Ambiente hetan de'it tokon \$1,5. Ami hanoin katak aumentu alokasaun ida ne'e sei lori implikasaun realistíku liu bainhira foka ba asuntu prevensaun ida reziliente liu husi risku ambientál sira ne'ebé sei akontese iha futuru.

Maske iha ona fundu klimátika, hirak ne'e la'ós direta atu responde ba dezvoltamentu ba iha infrastrutura ou oinsá bele halo nasaun no povu ida ne'e reziliente husi kondisaun klimátika. Governu labele husik responsabilidade hodi hein de'it apoia husi rai seluk tanba maioria husi fundu klimátika promove de'it interese esteriór sira nian duke nasaun nia vulnerabilidade no promove de'it injustisa klimátika.

Rekomendasaun

Haktuir ba ami nia analiza no hanoin sira ne'ebé deskreve ona antes, ami mós sumariza konkluzau no rekomendasaun sira hanesan tuir mai ne'e.

1. Ami haree katak proposta OJE 2024 nian Governu kontinua promove nivel despeza ida ne'ebé la sustentável no la realistíku liu hodi kondisiona no realiza oinsá mak bele prevene nasaun Timor-Leste husi monu ba rai naruk fiskál. Ami sujere Governu presiza redús gastu sira ba projetu boot no gastu la nesesáriu, hanesan despeza ne'ebé fasilita programa sira ne'ebé tuir loloos la merese atu aloka osan, hanesan kustu ba aluga fatin, catering no redús osan ba item sira hanesan kombustível, komunikasaun, osan ba selu asesór no kustu ba item sira seluk.
2. Parlamentu Nasionál presiza kestiona ba Governu kona ba sira nia analiza ne'ebé konsiente katak FP sei la dura ba tempu naruk, maibé iha tempu hanesan sira nia projesaun hatudu katak sira nia kreximentu despeza sei aumenta ba 7,9% iha 2025-2028 no oinsá sira bele esplika katak sira prevene duni nasaun ne'e husi rai naruk fiskál.
3. Setór esensiál sira ne'ebé liga ba ema nia moris, hanesan saúde, edukasaun no bee/saneamentu, kontinua la sai prioridade, no hetan de'it menus 16% husi despeza hotu iha proposta OJE 2024. Maske Governu iha deskrisaun sira temi dala barak kona ba investe iha ema no kondisaun sosiál sira, realidade hatudu setór hirak ne'e lakon oportunidade. Ami hanoin katak Governu presiza sériu iha sira nia planu programa, no tenki duni hanoin katak investe iha ema mak solusaun justu liu hodi prepara ita nia jersaun ida ne'ebé reziliente, matenek no produtivu liu.
4. Membru Parlamentu sira presiza debate ho klaru ba promesa ne'ebé sira rasik hato'o ona iha rekursu sira atu investe maka'as iha setór produtivu, tanba realidade haktuir ba proposta husi Governu, setór produtivu kontinua la sai prioridade no nafatin investe iha setór indústría mina no gas hanesan Projetu Tasi Mane no Greater Sunrise.
5. Espektasaun katak adere ba ASEAN sei lori benefísiu ba Timor-Leste, maibé bainhira ita seidauk preparadu, ita nia ekonomia no setór produtivu sira seluk sei la fó vantajen ba Timor-Leste. Nune'e di'ak atu tetu didi'ak no prepara kondisaun rai laran antes tama ba ASEAN.
6. Asuntu ambiente haree de'it ba atividade ki'ik sira hanesan fó lisensiamentu. Timor-Leste foin hahú atividade perfurasaun petrolíferu *onshore* no minériu ne'ebé bele estraga rai, bee no anin ho impaktu boot ba comunidade lokál. Kondisaun réal hatudu katak nasaun ne'e frazil no vulneravel tebes bainhira risku ambientál sira mosu. Nune'e ami hanoin katak Governu presiza maximiza funsaun hodi foka ba asuntu ambientál ida ne'ebé holístiku, inklui ba hamenus risku husi mudansa klimátika, hanesan tau matan ba atividade sira no haforsa reziliénsia iha comunidade sira nia hela fatin, infraestrutura, nsst.
7. Ami hanoin katak iniciativa atu halo revizaun no avaliasaun PEDN 2011-2030 sai hanesan oportunidade di'ak atu haree kle'an no kuidadu hodi haktuir ba kondisaun réal ne'ebé

povu no nasaun ne'e hasoru. Ami sujere Parlamentu Nasionál no povu tenke involve iha prosesu ida ne'e, la'ós kontinua fó sala malu maibé atu ajuda no orienta direasaun nasaun nian ba oin, tanba bainhira desizaun konsidera ema hotu nia lian mak maneira ida justu liu.

Maske tempu limitadu tanba 'urjénsia', ami husi La'ó Hamutuk sempre prontu atu oferese ami nia kontribuisaun analítiku hodi ajuda Distintu/a Deputadu/a sira hodi halo diskusaun kle'an liu tan ba proposta Lei OJE ba 2024 molok halo aprovasaun final iha Parlamentu Nasionál.

Obrigadu barak ba Ita-boot sira hotu nia atensaun no konsiderasaun tomak.

Ami be saran lia,



Marta da Silva




Jonathan Gonsalves



Celestino Gusmão




Elizaria Febe Gomes



Mariano Ferreira



Elizabeth da Silva



Charles Scheiner